



Motindami

William Marrion Branham

Motindami na

Eleko ya

Lingomba ya Laodikia

Emoniseli 3:14-22

Komela mwanje na Lingomba na Laodikia ete, Ye, Bobele bongo, motatoli na sembo mpe na solo, ebandeli na bozalisi na Nzambe, alobi boye ete,

Nayebi misala na yo ete yo mpio te, yo moto mpe te. Mposa na ngai ete ozala mpio soko moto!

Bongo awa ezali yo mwa moto moke, nde na moto te, na mpio mpe te, etikali moke nakosanza yo na monoko na ngai.

Ozali koloba ete, Ngai mozui, nasili kozua mosolo mingi, nazali na bosenga na eloko te, mpe oyebi te ete yo moto na bolozi, na makambo na mawa, mobola, na miso makufi, na bolumbu.

Yango wana nazali kopesa yo toli ete osomba wolo na maboko na ngai, oyo esili konangwa na moto, ete ozala na mosolo mingi, na bilamba mpembe ete olata yango mpe nsoni na bolumbu na yo emonana te, na mafuta mpo na kopakola miso na yo ete otala.

Soko nayoki bolingo epai na banani, nakopamela bango nyonso, nakopesa bango etumbu.

Na bongo ozala na moto, mpe bongola motema. Yoka, natelemini na ekuke, mpe nazali kobeta; soko nani akoyoka mongongo na ngai mpe akozipola monoko na ndako, nakokota epai na ye mpe tokolia elambo, biso na ye.

Mpo na molongi nakopesa ye nzela na kofanda na ngai elongo na kiti na bokonzi na ngai, lokola ngai mpe nalongi mpe nafandi na Tata na ngai elongo na kiti na bokonzi na ye.

Oyo azali na litoi ayoka yango elobi Molimo na mangomba.

Motindami

Nandimi te mpenza ete eleko moko na lingomba etikali koyeba motindami oyo Nzambe atindelaki yango, longola bobele eleko ya liboso oyo Polo azalaki motindami na yango. Mpe, ata na eleko yango, mingi bayebaki te oyo ye azalaki.

Nzoka nde eleko oyo tozali kati na yango ekozala mokuse mingi. Makambo makosalema nokinoki. Na bongo, motindami mpo na eleko oyo ya Laodikia asengeli kosila koya, atako mbala mosusu naino toyebi ye te. Kasi ntango moko ekoya epai wapi akoyebana. Nzoka nde, nyonso wana, nakoki kotalisa yango polele, mpo ete tozali na Makomi oyo elobeli biso lolenge ya mosala na ye.

Ya liboso, motindami yango akozala mosakoli. Akozala na mosala ya mosakoli. Akozala na lotomo ya kosakola. Mosala yango ekotelema ngui na Liloba, mpo ete, ntango akopesa esakweli to akozua emononeli, ekozala ntango nyonso na “molongo ya Liloba”, mpe esakweli to emononeli yango ekokokisama NTANGO NYONSO. Akotatolama lokola mosakoli na ntina na bosolo na bisakweli na ye. Etaliselo ete azali mosakoli ezuami na Emoniseli 10:7: “Kasi wana ekoyula motindami na nsambo na kelelo na ye, na mikolo yango, libombami na Nzambe likosila kokoka lokola esakolaki Ye na basakoli, baombo na Ye”. Nzoka nde, moto oyo atangemi na eteni oyo, mpe abiangami “mwanje” kati na Biblia, azali ekelamu na lola TE. Mwanje na motoba oyo azali koyula kelelo azali ekelamu na lola; azuami na Emoniseli 9:13; mwanje na nsambo, na lolenge moko, azuami na Emoniseli 11:15. Ye oyo tozali kolobela, oyo azuami na Emoniseli 10:7, azali motindami na eleko ya nsambo: azali moto, mpe asengeli komema nsango na Nzambe, nsango na ye mpe mosala na ye esengeli kosilisa libombami na Nzambe, lokola esakolaki Ye na basakoli, baombo na Ye. Nzambe akotanga motindami oyo ya nsuka lokola mosakoli, MPO ETE AZALI MOSAKOLI; yango nde Polo azalaki na eleko ya liboso — eleko ya nsuka ezali mpe na mosakoli moko. Aмоса 3:6-7: “Mondule ekobetama nde na mboka mpe bato bakozanga kobanga? Mabe ekokwea na mboka mpe Yawe asali mosala te? Solo Nkolo Yawe akosala likambo te bobele ete akoyebisa mwango na Ye epai na baombo na Ye, bango basakoli”.

Ezali na ntango na nsuka nde nkake nsambo ya Yesu elobaki. Emoniseli 10:3-4 eyebisi biso: “Mpe agangi na makasi lokola kolela na nkosi. Wana egangi ye, nkake nsambo ilobi na mingongo na yango. Wana elobi nkake nsambo, nalingaki kokoma, nde nayoki mongongo kobima na likolo ete: Bomba makambo malobi nkake nsambo, koma yango mpe te”. Moto moko te ayebi oyo ezalaki na kati ya nkake yango. Nzoka nde, tozali

na mposa ya koyeba yango. Mpe mosakoli nde asengeli koyamba emoniseli na yango, mpo ete Nzambe azali bobele na motindo moko ya komonisa Liloba na Ye: ezali na nzela na mosakoli. Liloba ekomelaka biso ntango nyonso na nzela na mosakoli, mpe ekozala ntango nyonso bongo. Soko totali Makomi, ata likololikolo, na ntembe te tokomona ete, yango ezali mobeko na Nzambe. Nzambe oyo abongwanaka te mpe oyo abongolaka te motindo na Ye ya kosala makambo atindaka ntango nyonso mosakoli na Ye na eleko moko na moko, epai wapi bato batangwi na molongo na Nzambe. Bailikindo, pelamoko bato, wana epesi bango Liloba mokongo, Nzambe atindaka ntango nyonso moombo na Ye epai na bato yango (kasi bailikindo te) na lolenge ete asembola malakisi na lokuta, mpe azongisa bato epai na Nzambe.

Na bongo, tozali komona boyei na motindami mpo na eleko ya nsambo, mpe azali mosakoli.

Tozali komona kaka boyei na motindami yango na Emoniseli 10:7 te, kasi tomoni ete Liloba elobi na ntina na boyei na Eliya liboso na bozongi na Yesu. Matai 17:10: “Bayekoli batuni ye ete, Mpo na nini bakomeli bazali koloba ete ekoki ete Eliya aya liboso?” Mpe Yesu alobi: “Eliya azali nde koya mpe kobongisa makambo nyonso”. Liboso na boyei ya Nkolo na biso, Eliya asengeli kozonga mpo na mosala moko ya bozongisi kati na Lingomba. Yango nde elobi Malaki 4:5: “Tala, Ngai nakotindela bino mosakoli Eliya liboso na koya na mokolo monene mpe na nsomo na Yawe. Akobongola mitema na batata epai na bana mpe mitema na bana epai na batata na bango ete Naya mpe Nabeta mokili na ekweli mabe te”. Ezali na ntembe te ete Eliya asengeli kozonga liboso na boyei na Yesu. Asengeli kosala mosala moko moyebani malamumu. Mosala yango ezali eteni ya Malaki 4:6 oyo elobi ete “akobongola mitema na bana epai na batata na bango”. Ntina oyo toyebi ete yango ezali mosala moyebani malamumu oyo asengeli kokokisa na ntango oyo, ezali ete asilaki kokokisa eteni oyo elobi ete “akobongola mitema na batata epai na bana na bango” ntango mosala na Eliya ezalaki awa na kati na Yoane Mobatisi. Luka 1:17: “Ye mpe akokende liboso na Nzambe na molimo mpe na nguaya na Eliya. Akozongisa mitema na batata epai na bana, mpe bato na nkanza na nzela na mayele na bayengebeni, mpo na kobongisela Nkolo libota likobonga mpenza”. Mosala na Yoane ezongisaka “mitema na batata epai na bana na bango”. Toyebi yango, mpo ete Yesu alobaki yango. Kasi elobami te ete mitema na bana ezongisamaki epai na batata na bango. Oyo nde naino esalemi te. Mitema na bana ya mokolo na nsuka mikozongisama epai na batata ya mokolo na Nkitela. Yoane alengelaki batata mpo ete Yesu ayamba bana na kati ya lopango. Nzoka nde, mosakoli oyo Molimo na Eliya ekokitela ye, akolengele bana mpo ete bayamba Yesu na bozongi na Ye.

Yesu apesaki na Yoane Mobatisi nkombo ya Eliya. Matai 17:12: “Nde Nazali koloba na bino ete, Eliya asili koya nde bayebaki ye te kasi basalelaki ye lokola elingaki bango”. Ntina oyo abengaki Yoane, Eliya, ezali ete bobele Molimo oyo ezalaki likolo na Eliya nde ezongaki likolo na Yoane, pelamoko Molimo yango ezongaki likolo na Elisa nsima na bokonzi ya mokonzi Akaba. Nzoka nde, mbala moko lisusu, Molimo yango

ekozonga likolo na moto mosusu, mpenza-mpenza liboso na bozongi na Yesu. Akozala mosakoli. Nzambe akotatola ye lokola mosakoli. Lokola Yesu Ye moko akozala wana te na nzoto mpo na kotatola ye (ndenge Asalaka yango mpo na Yoane), Molimo Mosantu nde akosala yango, na lolenge ete mosala ya mosakoli yango ekobilama na komonisama na nguya mpe na kokamwa. Lokola mosakoli, emoniseli moko na moko ekotatolama, mpamba te emoniseli moko na moko ekokokisama. Na nzela na kondima, bikamwa minene mpe na nguya bikokokisama na mitindo na ye. Na nsima, akoteya nsango oyo Nzambe apesaki ye na kati ya Liloba, mpo azongisa bato na bosolo mpe na nguya ya solo ya Nzambe. Ndambo na bato bakoyoka ye, kasi mingi, ndenge tokokaki kokanisa, bakoboya ye.

Lokola motindami-mosakoli yango ya Emoniseli 10:7 akozala bobele ye moko na oyo ya Malaki 4:5-6, akokokana mpenza na Eliya mpe na Yoane. Bango mibale bazalaki bato oyo bakeseneke na biteyelo na kosambela oyo eyebanaki na ntango na bango. Bango mibale balingaki bikelamu. Bango mibale bazalaki kosala bobele soko bayambi “Yango elobi Nkolo” kouta mbala moko na Nzambe, na nzela na emoniseli. Bango mibale bakweisaki milongo ya basambeli mpe bakambi ya molimo na ntango na bango. Mpe kaka oyo te, kasi batelemelaki mpe baoyo babebisamaki to bakokaki kobebisa bamosusu. Mpe botala ete bango mibale basakolaki mingi kotelemela basi na bosoni mpe bizaleli na bango. Eliya agangelaki Yezabele, mpe Yoane apamelaki Elodia, mwasi ya Filipo.

Akoyebana na bato ebele te, kasi ata bongo, Nzambe akotatola ye. Pelamoko Yesu andimaki Yoane, mpe Molimo Mosantu andimaki Yesu, tokoki mpe kokanisa ete moto yango akondimama na Molimo oyo ekosala kati na bomoi na ye na nzela ya misala na nguya na ntembe te mpe oyo ezuami epai mosusu te; Yesu Ye moko, na bozongi na Ye, akondima ye ndenge Andimaki Yoane. Yoane atatulaki na ntina na boyei na Yesu; — ndenge moko na moto oyo, akotatola na ntina na boyei na Yesu lokola Yoane. Mpe bozongi mpenza ya Klisto ekotalisa polele ete moto yango azalaki mpenza oyo asengelaki koya liboso na boyei na Ye ya mibale. Oyo ezali etaliselo ya nsuka ete azali mpenza mosakoli ya Malaki 4, mpo nsuka na ntango na Mabota ezali bomonani na Yesu Ye moko. Na bongo, ntango ekosila koleka mpo na baoyo bakosila koboya ye.

Mpo tomonisa polele koleka mosakoli yango ya mokolo na nsuka, toyeba malamumu ete mosakoli ya Matai 11:12 ezalaki Yoane Mobatizi, oyo boyei na ye esakolamaka na Malaki 3:1: “Tala, Nazali kotinda ntoma na Ngai mpo na kobongisa nzela liboso na Ngai mpe Nkolo oyo bino bozali koluka Ye akoya pwasa na tempelo na Ye; Ntoma na Kondimana oyo bino bozali kosepela mpo na Ye, tala Azali koya! Yawe na bibele alobi bongo”. Matai 11:1-12: “Esilaki Yesu kolakisa bayekoli na Ye zomi na mibale, Alongwi wana mpo na kolakisa mpe kosakola kati na mboka na bango. Eyokaki Yoane kati na boloko mpo na misala na Klisto, atindi monoko na bayekoli na ye, alobi na Ye ete, Yo ozali Ye oyo akoya soko totalela mosusu? Yesu azongisi liloba, alobi ete, Bokende komonisa Yoane makambo mayoki bino mpe mamoni bino. Bakufi miso bazali komona

lisusu mpe mikatatali bazali kotambola, bato na mbala bazali kopetwa mpe bakufi matoi bazali koyoka, bakufi bazali kosekwa mpe babola bazali koyoka nsago malamumu. Lipamboli epai na ye oyo akoyoka nsoni mpo na Ngai te. Ezalaki bango kokende, Yesu abandi koloba na bibelet mpo na Yoane ete, Bokei na lisobe mpo na kotala nini? Mokekele mokunzami na mopepe? Kasi bokei komona nini? Moto oyo alati bilamba na petepete? Tala baoyo balati bilamba na petepete bazali na ndako na mikonzi. Kasi bokei mpo na nini? Komona mosakoli? Ee, Nazali koloba na bino ete, oyo azali koleka mosakoli. Azali ye oyo ekomami mpo na ye ete, Tala Nakotinda ntoma na Ngai liboso na elongi na Yo, oyo akobongisa nzela na Yo liboso na Yo. Nazali koloba na bino solo ete, moto moko te abimi kati na baoyo babotami na basi, oyo aleki Yoane Mobatisi. Nde ye oyo aleki moke kati na bokonzi na likolo aleki ye na monene”. Yango esila koleka. Ekokisama. Esili. Kasi botala malamumu sasaipi Malaki 4:1-6: “Zambi tala, mokolo ezali koya, ezali kozika lokola moto makasi; mpe bato nyonso na lolendo mpe basali na mabe bakozala lokola mpumbulu. Mokolo oyo ekoya ekozikisa bango kino ekotika etape to mosisa epai na bango te. Yawe na bibelet alobi bongo. Kasi mpo na bino, bato baoyo bokotosaka Nkombo na Ngai, Moi na Boyengebene ekobimela bino na kobikisa kati na mapapu na Yango, bokobima awa bokopombwapombwa lokola bana na ngombe kati na lopango. Bokonyatela bato mabe na nse mpo ete bakozala mputulu na nse na makolo na bino na mokolo mozali Ngai kobongisa. Yawe na bibelet alobi bongo. Bokanisa mobeko na Mose, moombo na Ngai, oyo Nalakelaki ye kati na Holebe mpo na Yisalaele mobimba, yango malako mpe kosambisa-sembo. Tala, Ngai nakotindela bino mosakoli Eliya liboso na koya na mokolo monene mpe na nsomo na Yawe. Akobongola mitema na batata epai na bana mpe mitema na bana epai na batata na bango ete Naya mpe Nabeta mokili na ekweli mabe te”. Bomoni, mpenza-mpenza nsima na boyei ya Eliya OYO, mabele ekopetolama na moto mpe bato mabe bakokoma mputulu. Toyebi malamumu ete, yango esalemaki TE na ntango na Yoane (Eliya ya ntango wana). Molimo na Nzambe oyo esakolaka boyei ya motindami na Malaki 3:1 (Yoane) ezongelaki bobele esakweli na Ye ya liboso oyo ya Yisaya 40:3, oyo epesamaka koleka mibu nkama misato liboso. “Mongongo ezali koganga ete. Kati na lisobe, bobongisa nzela na Yawe, kati na esika mpamba, bosembola balabala mpo na Nzambe na biso”. Nzoka nde Yoane, na nzela ya Molimo Mosantu, amonisaka maloba ya Yisaya mpe ya Malaki kolobaka na Matai 3:3: “Yoane ezali ye oyo mosakoli Yisaya alobaki mpo na ye ete, Mongongo na mogangi kati na lisobe ete : Bongisa balabala na Nkolo, mpe sembola nzela na Ye”. Na bongo, kokokana na milongo oyo, tokoki komona malamumu ete mosakoli ya malaki 3, oyo ezalaki Yoane, azali mosakoli ya Malaki 4 TE, atako ya solo *Molimo moko oyo ezalaka likolo na Eliya, ezali mbala moko likolo na Yoane mpe likolo na mosakoli oyo ya mokolo na nsuka.*

Nzoka nde, motindami oyo ya Malaki 4 mpe ya Emoniseli 10:7 akosala makambo mibale. Ya liboso: kokokana na Mal. 4, akozongisa mitema na bana epai na batata na bango. Ya mibale: akomonisa mabombami ya nkake nsambo ya Emoniseli 10, oyo ezali bimoniseli

bizuami kati na bilembo nsambo. Ekozala ba “bosolo-mabombami” yango oyo ekomonisama na Nzambe nde ekozongisa mpenza mitema na bana epai na batata ya mokolo na Nkitela. Ekozala mpenza bongo.

Kasi botala mpe likambo oyo. Motindami-mosakoli oyo, na lolenge mpe motindo na ye, akokokana na Eliya mpe na Yoane. Na mikolo ya motindami-mosakoli oyo, bato bakozala lokola baoyo bazalaki na ntango na Akaba mpe na ntango na Yoane. Mpe lokola “BOBELE BANA” nde motema na bango ekozongisama, bobele bana nde bakoyoka. Na ntango na Akaba, bobele Baisalaele 7.000 nde bautaki na momboto malamumu. Na ntango na Yoane, bazalaki mpe moke mpenza. Kati na bileko oyo mibale, bato mingi bazalaki kobika kati na pite ya kosambela bikeko.

Nalingi kokokanisa lisusu motindami-mosakoli ya Laodikia na Yoane, motindami-mosakoli oyo ayaki liboso na boyei ya liboso na Yesu. Bato ya ntango na Yoane bakamataki ye lokola Masiya. Yoane 1:19-20: “Litatoli na Yoane ezali boye. Wana etindaki Bayuda banganga mpe Balewi uta na Yelusaleme epai na ye ete batuna ye ete: Yo nani? Ayamboli, aangani te nde ayamboli ete, ngai mpenza nazali Klisto te”. Nzoka nde, motindami-mosakoli oyo ya mokolo na nsuka akozala na nguya monene liboso na Nkolo, na lolenge ete bamosusu bakokamata ye lokola Nkolo Yesu. (Na ntango na nsuka molimo moko ekozala na mokili oyo ekopenguisa ebele na bato, mpe ekosala ete bandima yango. Matai 24:23-26: “Zambi baklisto na lokuta mpe basakoli na lokuta bakotelema mpe bakomonisa bikamwiseli minene mpo na kopengwisa baponami, soko nde bakokoka. Tala Nasili koyebisa bino liboso. Bongo soko bakoloba na bino ete, Tala Azali na lisobe, bobima te. Soko ete, Azali na biteni na katikati na ndako, bondima te”). Bondima yango te. Azali Yesu-Klisto te. Azali Mwana na Nzambe te. AZALI MOKO KATI NA BANDEKO, MOSAKOLI, MOTINDAMI, MOOMBO NA NZAMBE. Asengeli te kozua lokumu monene koleka oyo Yoane azuaki ntango azalaki mongongo mozalaki koganga: “Nazali Klisto te; KASI YE AZALI KOYA NSIMA NA NGAI”.

Liboso totika mokapo oyo etali motindami na eleko ya Laodikia, tosengeli kotala malamumu makanisi oyo mibale. Ya liboso: Eleko oyo ekozala na Motindami-Mosakoli MOKO. Emoniseli 10:7 elobi: “Wana ekoyula ye (boko) kelelo”. Ata mbala moko te Nzambe apesa na bato na Ye basakoli minene mibale na mbala moko. Apesaki Enoka (ye moko); Noa (ye moko); Mose (bobele ye nde azalaki na Liloba, atako bamosusu basakolaki); Yoane Mobatisi ayaki YE MOKO. Nzoka nde, na mikolo oyo na nsuka, esengeli ete MOSAKOLI moko azala (kasi ya mwasi te — atako na eleko oyo basi oyo bazali komiloba ete bazali komema emoniseli na Nzambe bazali mingi koleka mibali), mpe Liloba oyo ekweaka te elobi ete *ye* (mosakoli) akomonisa mabombami na bato ya ntango na nsuka, mpe akozongisa mitema na bana epai na batata. Bamosusu balobaka ete bato na Nzambe bakosangana uta na *emoniseli ya lisanga*. Natelemeli maloba oyo. Ezali maloba oyo ebibisami mobimba na Emoniseli 10:7. Nzoka nde, naboyi te ete bato bakosakola, kati na eleko oyo na nsuka, mpe ete mosala na bango ekoki kozala sembo mpe ekozala bongo. Naboyi te ete basakoli

bakozala lokola na ntango na Polo, epai wapi ezalaki na “mosakoli moko na nkombo Agaba oyo asakolaka na ntina na nzala monene”. Nandimi nyonso wana. KASI, KOKOKANA NA LITATOLI OYO EKOKI KOKWEA TE YA LILOBA, NANDIMI TE ETE MOTINDAMI-MOSAKOLI MONENE AKOLEKA MOTANGO YA MOKO MPO NA KOMONISA MABOMBAMI MAZUAMI KATI NA LILOBA, MPE OYO AZALI NA MOSALA YA KOZONGISA MOTEMA NA BANA EPAI NA BATATA. Na nzela ya Liloba na Ye oyo ekoki kokwea te, “Yango elobi Nkolo” ezali naino na motuya, ekozala ntango nyonso na motuya, mpe ekotatolama. Motindami-mosakoli moko azali mpo na eleko oyo. Koyebaka bizaleli ya bomoto, moto nyonso ayebi ete bokesezi ezalaka ntango nyonso na makambo ya mikemike oyo elandaka lilakisi na motuya, atako bato nyonso bandimi lilakisi yango. Mpo eleko oyo ya nsuka esengeli kozonga na ebandeli mpo na kokoka komonisa Mwasi na libala na Liloba ya Peto, nani yango akoyamba likoki lya bozangi kokwea oyo esengeli kozongisama na eleko oyo ya nsuka? Yango elingi koloba ete, mbala moko lisusu, tokozua Liloba, ndenge epesamaki mpe esosolamaki be na ntango na Polo. Nakoyebisa bino nani akozua Liloba yango. Ekozala mosakoli moko oyo Nzambe akotatola ye na mobimba, to mpe na koleka lisusu, lokola basakoli mosusu nyonso, kobanda na Enoka kino na mikolo na biso, mpo ete moto yango, ndenge esengeli, akozala na mosala ya esakweli ya libanga na moto, mpe Nzambe Ye moko akomonisa ye. Akosengela komisembolisa ye moko te, Nzambe nde akoloba mpo na ye na nzela ya mongongo na elemba. Amen.

Likanisi ya mibale oyo tosengeli kokanga makasi na mitema na biso ezali ete bileko nsambo na lingomba ebandaki na molimo ya motemeli na Klisto mpe na Molimo Mosantu, Molimo Mosantu oyo tosengeli kopambola libela na libela. I Yoane 4:1: “Balingami, bondima milimo nyonso te, kasi bomeka milimo soko miuti na Nzambe, mpo ete *basakoli* na lokuta mingi basili kobima kati na mokili”. Nzomoni malamumu? Molimo na motemeli na Klisto ekokanisami na basakoli na lokuta. Bileko bibandaki na basakoli na lokuta, mpe bikosuka na basakoli na lokuta. Solo mpenza, MOSAKOLI NA LOKUTA OYO YA SOLOSOLO akozala, mosakoli na lokuta na mobimba, ndenge ekomami mpo na ye na Emoniseli. Kasi liboso na ye komonisama, basakoli mosusu ebele na lokuta bakomonana lisusu. Matai 24:23-26: “Yango wana, soko nani akoloba na bino ete, Tala Klisto wana, soko ete, Tala Ye oyo, bondima te. Zambi baklisto na lokuta mpe basakoli na lokuta bakotelema mpe bakomonisa bilembo mpe bikamwiseli minene mpo na kopengwisa baponami, soko nde bakokoka. Tala nasili koyebisa bino liboso. Bongo soko bakoloba na bino ete, Tala Azali na lisobe, bobima te. Soko ete, Tala Azali na biteni na katikati na ndako, bondima te”. Basakoli na lokuta yango batalisameli biso na biteni ebele ya Makomi Mosantu, lokola: II Petelo 2:1-2: “Kasi basakoli na lokuta bazalaki kati na bato pelamoko balakisi na lokuta bazali kati na bino. Bango bakoyeisa mikabwano na libebi, bakoangana ata Mokonzi oyo asili kosikola bango, bakobanda libebi noki epai na bango mpenza. Mingi bakobila mobulu na bango monene mpo na bango, nzela na solo ekotukama”. II Timote 4:3-4: “Mpo ete ntango ekoya wana ekoyokaka bato

mateyo na nsembo te kasi, mpo na konyomitisa matoi na bango, bakoyanganisa balakisi kobila mposa na bango mpenza; bakopengwa longwa na koyoka makambo na solo, bakobongwa koyoka masese na mpamba”. I Timote 4:1: “Molimo azali koloba polele ete na ntango na nsuka, bamosusu bakopengwa longwa na kondima mpo na kobila milimo na kozimbisa mpe mateyo na milimo mabe”. Nzoka nde, na likambo moko na moko, bokomona ete mosakoli na lokuta azali moto oyo azali libanda na Liloba. Pelamoko tolakisaki bino ete “motemeli na Klisto” elingi koloba “motemeli na Liloba”, boye basakoli na lokuta oyo bazali kobebisa Liloba, kopesaka yango ndimbola oyo ekokani na miango na bango ya zabulu. Bosila komona ndenge nini baoyo bakambaka bato oyo bayokaka bango libanda na solo, bakangisaka bango epai na bango mei na nzela na kobangisa? Balobaka na bango ete soko batosi te to soko batiki bango, bakokufa. Bazali basakoli na lokuta, mpo mosakoli na solo akokamba bato ntango nyonso epai na Liloba, mpe akokangisa bango na Yesu Klisto, mpe mosakoli yango akoloba na bango te ete babangaka ye, to oyo ye alobaka, kasi nde babangaka oyo Liloba elobi. Botala lisusu boni basakoli yango na lokuta, bakokani na Yudasi, balandaka misolo. Bakotinda bino boteka bozui na bino mpe bopesa bango nyonso mpo bakokisa miango na bango. Balekisaka ntango molai mpo na kokongola makabo koleka ntango na koteya Liloba. Baoyo bamekaka kosalela makabo basalelaka likabo oyo ekoki kosala mwa libunga mpe bakosalaka mpo na mbongo, batiolaka Liloba mpe balobaka ete ezali mpo na Nzambe. Mpe bato bakendaka epai na bango, bandimaka bango, bapesaka bango lisungi na bango, bandimelaka bango, kozanga koyeba ete bakambami na nzela na kufa. Iyo, mboka etondi na bamekoli na lolenge ya nzoto. Na mokolo oyo na nsuka, bakomeka komekola motindami-mosakoli. Bana nsambo ya Sekewa bamekaki komekola Polo. Simona moto na soloka amekaki komekola Petelo. Bomekoli yango ekozala mpenza ya nzoto. Bakokoka te kosala oyo mosakoli ya solo asalaka. Ntango ye akoloba ete kolamuka esili, bango bakokende kotatola bipai nyonso na ntina na emoniseli monene, kolobaka ete oyo bato bazali na yango ezali mpenza solo, mpe ete Nzambe akosala lisusu makambo mpe bikamwa minene koleka kati na bato. Mpe bato bakolanda bango. Bobele basakoli yango na lokuta bakosakola ete motindami na mokolo na nsuka azali moto na likindo te, mpe ete, na bongo, esengeli te ete bato bayoka ye. Bakokoka te kosala oyo motindami asalaka; Nzambe akotatola mosala na bango te ndenge azali kotatola oyo ya mosakoli ya ntango na nsuka; nzoka nde, na maloba na bango ya kafukafu mpe bozito ya lokumu na bango na mokili mobimba, bakokebisa bato mpo ete bayoka moto oyo (motindami) te, kolobaka ete malakisi na ye ezali bobele lokuta na lokuta. Bazali kotambola mpenza na nzela ya batata na bango, Bafalisai, baoyo bazalaki ya zabulu, mpo bazalaki koloba ete Yoane na Yesu, bango mibale, bazalaki kolakisa malakisi na lokuta.

Nzoka nde, mpo na nini kasi basakoli oyo na lokuta bazali kotelemela mosakoli na solo mpe bazali kokitisa lokumu ya malakisi na ye? Ezali mpo ete yango nde lolenge na bango, ndenge ezalaki mpo na baoyo bayaki liboso na bango na ntango na Akaba, wana etelemelaki bango Mika.

Bazalaki nkama minei, mpe *bango nyonso bazalaki na boyokani*; mpe, *nakolobaka ndenge moko bango nyonso, bapengwisaki bato*. Kasi mosakoli MOKO—moko mpamba—alongaki, mpe bamosusu nyonso bazalaki kati na libunga, mpo ete Nzambe apesaki emoniseli epai na MOKO MPAMBA.

Bokeba na basakoli na lokuta, mpo bazali nkoi na kongala.

Soko bozali naino na ntembe na ntina na yango, botuna Nzambe, na nzela ya Molimo na Ye, ete Atondisa bino mpe Akamba bino, MPO BAPONAMI BAKOKI KOPENGWISAMA TE. Bososoli yango? Moto moko akoki kokosa bino te. Polo ye moko akokaki kokosa moponami moko te, soko alobaki to asalaki mbeba. Mpe na eleko ya liboso, eleko ya Efese, baponami bakokaki kopengwisama te, mpo ete bazalaki komeka bantoma na lokuta mpe basakoli na lokuta, mpe nsima na bango komona ete bazalaki bakosi, bazalaki koboya bango. Aleluya! Bampate na YE bayokaka mongongo na Ye, mpe babilaka YE. Amen! Nandimi yango.



LIKONZI NA MOTO

Likonzi na Moto likolo na moto ya Ndeko Branham ekangamaki na foto na Houston, Texas, na sanza ya yambo ya 1950. Yango ebilaki Ndeko Branham uta mbotama na ye na 1909. Na 1933, ezalaki ye kopesa libatishi na ebale ya Ohio, na Jeffersonville, Indiana, Ezali oyo na bonzambe amonanaki liboso ya bato mokama na mokama, mpe alobaki na Ndeko Branham: “Pelamoko Yoane Mobatishi atindamaki yambo ya boyei ya liboso ya Klisto, yo otindami yambo ya Boyei na Ye ya mibale”.

Nsango oyo ya Ndeko William Marrion Branham, *Motindami* mpe *Likebisi ya Nsuka ya Molimo*, ebendami na mokapo ya Eleko ya Lingomba ya Laodikia ya buku na ye etangemi *Botalisami na Bileko Nsambo na Lingomba*; ekomami awa mobimba mpe ekabolami *ofele* na Voice of God Recordings. Esalemi na lingala na mobu 2004.

Biteni ya maloba oyo ekomami na nkasa ya nsuka na libanda ya buku ekamatami na kati ya buku yango.

LINGALA

©2004 VGR, ALL RIGHTS RESERVED

Mateya ya Ndeko William Marrion Branham ekangamaki liboso na ba-bande, tozali na mateya koleka 1100, mpe toyikanisi yango mobimba. Tozali na ebele ya mateya yango na lolenge ya buku; ekomami mobimba mpe okoki kozua yango *ofele*. Okoki kozua ba-bande, buku, ba-film na ba-foto, mpe soko olingi koyeba malamumu makambo matali mosala oyo ya mokili mobimba, okoki kokoma na :

VOICE OF GOD RECORDINGS
P.O. Box 950, Jeffersonville, Indiana 47131 U.S.A.
www.branham.org

Likebisi ya Nsuka ya Molimo

Emoniseli 3.22: “Oyo azali na matoi ayoka yango elobi Molimo na Mangomba”.

Ezali likebisi ya NSUKA. Mosusu ekozala te. Esika ya kiti na bokonzi esili kobongisama. Miboko zomi na mibale misili kotiamama. Babalabala esili kosalema na wolo. Bikuke na mangiliti minene bisili kotelemisama mpe kotiamama na bikakiseli na yango. Lokola piramide, eteleme, kitoko mpe na nkembo. Bizali na lola oyo babongisi yango bazali kotala yango, bazangi maloba mpo na kitoko na yango, mpamba te ezali kongenga mpe kongala na nkembo na mokili oyo te. Ngambo moko na moko ya kitoko na yango ezali kobeta lisolo ya ngolu na kokamwa mpe ya bolingo na Yesu. Ezali engumba oyo ebongisami mpo na bato oyo babongisami. Ezali bobele kozela bafandi na yango; na mwa ntango moke ebele na bato bakotondisa balabala na yango na esengo. Iyo, mbela oyo ezali ya nsuka. *Molimo akoloba lisusu te na eleko mosusu*. Bileko bisili.

Kasi Nzambe akumisama, na ntango oyo, eleko oyo esili naino te. Azali naino koganga. Mpe koganga na Ye ezali koyokana bobele na matoi ya molimo na bato na nzela ya Molimo na Ye te, kasi mbala moko lisusu, mosakoli moko azali na mokili. Mbala moko lisusu, Nzambe akomonisa bosolo ndenge Asalaki yango na Polo. Na mikolo ya motindami na nsambo, na mikolo ya eleko ya Laodikia, motindami na yango akomonisa mabombami na Nzambe, ndenge mamonisamelaki Polo. Akoloba, mpe baoyo bakoyamba mosakoli yango na nkombo na ye mei bakoyamba mbano kitoko ya mosala na ye. Mpe baoyo bakoyoka ye bakopambolama, mpe bakozala kati na mwasi na libala ya mokolo na nsuka, oyo ekomami na ntina na ye na Emoniseli 22.17: “Molimo mpe mwasi na libala balobi ete: Yaka”. Mbuma na lisangu (Mwasi-Lisangu) oyo ekundamaki na Nicée ezongeli kozala Liloba-mbuma malamau ya ebandeli. Nzambe akumisama libela na libela. Iyo, boyoka mosakoli na Nzambe, oyo andimami na Nzambe, oyo amonani na eleko oyo ya nsuka. Oyo azali koloba kouta na Nzambe, Mwasi na libala mpe akoloba yango. Molimo, mosakoli mpe mwasi na libala, bango misato bakoloba ndenge moko. Mpe oyo bakoloba ekozala oyo esila kolobama na Liloba. Bazali koloba yango sasaipi: “Bobima libanda na ye, mpe bokabwana”. Ligangi liyokani. Ezali naino koyokana. Ekoyokana kino ntango nini? Toyebi eloko moko te na ntina na yango, kasi oyo toyebi ezali ete, etikali ntango molai te, mpamba te eleko oyo ezali ya nsuka.

Oyo azali na matoi ayoka yango elobi Molimo na mangomba. Molimo alobi. Moi ekomi kolala; ekolimwa na mwa ntango moke kati na seko na seko mpo na bileko ya lingomba. Na bongo, nyonso ekosila. Na bongo, ntango ekosila koleka mpo na koya. Kasi soko, esika moko na kati ya bolandani ya mateya oyo, Nzambe asololi na yo na nzela ya Molimo na Ye, ekozala malamau ete obelema na Ye na nzela ya kobongola motema, mpe otika bomoi na yo epai na Ye, na ntina ete, na nzela na Molimo na Ye, Akoka kopesa yo bomoi ya seko.

“YANGO ELOBI NKOLO”

“mongongo na motindami ya nsambo”

“motindami-mosakoli mpo na eleko oyo”

“likoki lya bozangi kokwea”

“mosala ya esakweli ya libanga na moto”

“motindami-mosakoli ya Emoniseli 10.7”

“bobele ye oyo ya Malaki 4.5-6”

“Nzambe akotatola ye”

“andimami na molimo”

**“motindami yambo ya
boyei na Ye ya mibale”**

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org